

歷朝

五十三種

部

觀大

三

百一

古今說海

明雲間陸氏原編

集成圖書公司印行

集百



說纂第一編



上海图书馆藏书



A541 212 0017 0138B

明
雲
間
陸
氏
原
編

說
纂

集
成
圖
書
公
司
印



宣統元年季冬月
第二次印於上海

欽定四庫全書提要

漢武故事一卷

舊本題漢班固撰然史不云固有此書隋志著錄傳記類中亦不云固作晁公武讀書志引張柬之洞冥記跋謂出於王儉唐初去齊梁未遠當有所考也所言亦多與史記漢書相出入而雜以妖妄之語然如藝文類聚三輔黃圖太平御覽諸書所引甲帳珠簾王母青雀茂陵玉椀諸事稱出漢武故事者乃皆無之又李善註文選西征賦引漢武故事二條其一爲柏谷亭事此本亦無之其一爲衛子夫事此本雖有之而文反略於善註考隋志載此書二卷諸家著錄並同錢曾讀書敏求記亦尙作二卷稱所藏凡二本一是錫山秦汝操繡石書堂本一是陳文燭晦伯家本又與秦本互異今兩存之云云兩本今皆未見此本爲明吳瑄古今逸史所刻併爲一卷僅寥寥七八

頁蓋已經刊削又非兩家之本以其六朝舊帙姑存備古書之一種云爾

古今說海

說纂目錄

甲集三卷

漢武故事

良嶽記

青溪寇軌

乙集三卷

煬帝海山記

煬帝迷樓記

煬帝開河記

丙集二卷

江行雜錄

行營雜錄

丁集二卷

避暑漫抄

養疴漫筆

戊集二卷

虛谷閒抄

蓼花洲閒錄

己集二卷

樂府雜錄

敦坊記

庚集二卷

北里志

青樓集

辛集四卷

雜纂三卷

損齋備忘錄

壬集二卷

復辟錄

靖難功臣錄

癸集一卷

備遺錄

已上逸事家六卷散錄家六卷雜纂家十一卷總二十三卷

目錄終

古今說海

漢武古事

說纂一 逸事一

漢景帝王皇后槐里王仲女也名姝兒母臧氏臧荼孫也初爲仲妻生一男兩女其一女卽后也仲死更嫁長陵田氏生二男后少孤始嫁與金王孫生一男矣相工姚翁善相人千百弗失見后而歎曰天下貴人也當生天子田氏乃奪后歸納太子宮得幸有娠夢日入懷景帝亦夢高祖謂已曰王美人得子可名爲彘及生男因名焉是爲武帝帝以乙酉年七月七日且生於猗蘭殿年四歲立爲膠東王少而聰明有智術與宮人諸兄弟戲善徵其意而應之大小皆得其歡心及在上前恭敬應對有若成人太后下及侍衛咸異之是時薄皇后無子立栗姬子爲太子長公主嫖有女欲與太子婚栗姬妬寵少袁王夫人因令告栗姬曰長公主前納美人得幸於上子何不私謁長公主結之乎時諸美人皆因長公主見得貴幸也故栗姬怒不聽因謝長公主不許婚長公主亦怒王夫人因厚事之長公主更欲與王夫人男婚上未許後長主還宮膠東王數歲公主抱置膝上問曰兒欲得婦否長主指左右長御百餘

人皆云不用指其女阿嬌好否笑對曰好若得阿嬌作婦當作金屋貯之長主大悅乃苦要上遂成婚焉皇后既廢栗姬次應立而長主伺其短輒徵白之上嘗與栗姬語屬諸姬子曰吾百歲後善視之栗姬怒弗肯應又罵上老狗上心銜之未發也長主日譖之因譽王夫人男之美王夫人陰告長主使大臣請立栗姬爲后上以爲栗姬諷之遂發怒誅大臣廢太子爲王栗姬自殺遂立王夫人爲后膠東王爲太子時年七歲上曰彘者徹也因改名徹廷尉上囚防年繼母陳氏殺年父年因殺陳依律殺母大逆論帝疑之詔問太子對曰夫繼母如母明其不及也緣父之愛故謂之母爾今繼母無狀手殺其父則下手之日母恩絕矣宜與殺人者同不宜大逆論帝從之棄市議者稱善太子年十四卽位改號建元長主伐其功求欲無厭上患之皇后寵亦衰皇太后謂上曰汝新卽位先爲明堂太皇太后已怒今又忤長主必重得罪婦人性易悅深愼之上納太皇戒復與長主和皇后寵幸如初建元六年太皇太后崩上始親政事好祀鬼神謀議征伐長主自伐滋甚每有所求上不復與長主怨望愈出醜言上怒欲廢皇后曰微長公主弗及此忘德弗祥且容之乃止然皇后寵遂

衰驕妬滋甚女巫楚服自言有術能令上意回晝夜祭祀合藥服之巫著男子衣冠幘帶素與皇后寢居相愛若夫婦上聞窮治侍御巫與后諸妖蠱呪咀女而男淫皆伏辜廢皇后處長門宮后雖廢供養如法長門無異其宮也長主以宿恩猶自親近後置酒王家見所幸董偃上爲之起偃能自媚於上貴寵聞於天下嘗宴飲宣室引公主及偃東方朔司馬相等並諫上不聽偃既富於財淫於他色與主漸疎主怒因閉於內不復聽交游上聞之賜偃死後卒與公主合葬元朔元年立衛子夫爲皇后初上幸平陽公主家置酒作樂子夫爲謳者善歌能造曲每歌挑上上喜動起更衣子夫因侍尙衣軒中遂得幸上見其美髮悅之遂納於宮中時宮女數千皆以次幸子夫新入在籍末歲餘不得見上擇宮人不中用者出之子夫因泣涕請出上曰吾昨夜夢子夫中庭生梓樹數株豈非天意乎是日幸之有娠生女凡三幸生二女後生男卽戾太子也淮南王安招方術之士皆謂神仙上聞而喜女事於是方士自燕齊至者數千人齊人李少翁年二百餘歲色若童子拜爲文成將軍歲餘術未驗上漸厭倦會所幸李夫人死上甚思悼之少翁云能致其神乃夜張帳明燭陳酒食

令上居他帳中遙見李夫人不得就視也上愈益想之乃作賦曰美聯娟以修嫫兮命夭絕而弗長飾莊宮以延佇兮泯不歸乎故鄉慘鬱鬱其悶感兮處幽隱而懷傷稅餘馬於上椒兮掩脩夜之不陽云云少翁者諸方皆驗唯祭太乙積年無應上怒誅之文成被誅後月餘使者籍資從關東還逢於渭亭謂使者曰爲吾謝上不能忍少日而敗大事乎上好自愛後四十年來我於蓬山方將共事不相怨也於是上大悔復徵諸方士上常輕服爲微行時丞相公孫弘數諫弗從弘謂其子曰吾年已八十餘陛下擢爲宰相士猶爲知己死況不世之君乎今陛下微行不已社稷必危吾雖不逮史魚冀萬一能以尸諫因自殺上聞而悲之自爲誅弘嘗諫伐匈奴爲之少止弘卒乃大發卒數十萬遣霍去病討匈奴折蘭過居延獲祭天金人於上林鑿昆明池又起栢梁臺以處神君神君者長陵女子也先嫁爲人妻生一男數歲死女子悲哀悼痛之亦死死而有靈其姒宛若宛若姒之名也祀之遂關也言語說人家小事頗有驗上遂祠神君請術初霍去病微時數自禱於神君神君乃見其形自修飾欲與去病交接去病不肯乃責之曰吾以神君清潔故齋戒祈福今覘欲爲淫此非神明也

因絕不復往神君亦慙及去病疾篤上令爲禱於神君神君曰霍將軍精氣少壽命弗長吾嘗欲以太一精補之可以延年霍將軍不曉此意遂見斷絕今病必死非可救也去病竟薨上造神君請術行之有効大抵不異容成也神君以道授宛若亦曉其術年百餘歲貌有少容衛太子未敗一年神君亡去自柏臺燒後神稍衰東方朔娶宛若爲小妻生三子與朔同日死時人疑化去未死也自後貴人公主慕其術專爲淫亂大者抵罪或夭死無復驗云東郡送一短人長五寸衣冠具足上疑其精召東方朔至朔呼短人曰巨靈阿母還來否短人不對因指謂上王母種桃三千年一結子此兒不長已三過偷之失王母意故被謫來此上大驚始知朔非世中人也短人謂上曰王母使人來告陛下求道之法惟有清靜不宜躁擾言終弗見上愈恨召朔問其道朔曰陛下自當知上以其神人不敢逼也乃出宮女希幸御者二十人以賜之朔與行道女子並年百歲而死惟一女子長陵徐氏號儀君善傳朔術至今上元延中已百三十七歲矣視之如童女諸侯貴人更迎致之問其道術善行交接之道無他法也受道者皆與之通或傳世淫之陳盛父子皆與之行道京中好淫亂者

爭就之翟丞相奏壞風俗請戮尤亂甚者今上弗聽乃徙女子於燉煌後遂入胡不知所終樂成侯上書言方士欒大膠東人故曾與文成侯同師上召見大悅大乃敢爲大言處之無疑上乃封爲樂通侯賜甲第僮奴千人乘輿車馬帷幄器物以充其家又以女公主妻之送金千斤更號當利公主連年妖妄滋甚而不効上怒收大腰斬之上起明光宮發燕趙美女二千人充之率皆十五以上二十以下年滿三十者出嫁之掖庭總籍凡諸宮美女萬有八千建章未央長安三宮皆輦道相屬率使宦者婦人分屬或以爲僕射大者領四五百小者領一二百人常被幸御者輒注其籍增其俸秩比六百石宮人旣多極被幸者數年一再遇挾婦人媚術者甚衆選二百人常從幸郡國載之後車與上同輦者十六人充數恒使滿皆自然美麗不假粉白黛綠侍尙衣軒者亦如之嘗自言能三日不食不能一日無婦人善行導養術故體常壯悅其應有子者皆記其時日賜金千斤孕者拜爵爲容華充侍衣之屬上巡狩過河間有紫青氣自地屬天望氣者以爲其下當有奇女天子之祥上使求之見有一女子在空館中姿貌殊絕兩手皆拳上令開其手數十人劈之莫能舒上於是自

披手手卽伸由是得幸號拳夫人進爲婕妤居鈇弋宮解黃帝素女之術大有寵有娠十四月而產是爲昭帝焉從上至甘泉因告上曰妾相運正應爲陛下生一男年七歲妾當死今必死於此不可得歸矣願陛下自愛宮中多巫蠱氣必傷聖體幸慎之言終而卒旣殯尸香聞十餘里因葬雲陵上哀悼之又疑其非常人乃發冢開視空棺無尸惟衣履存上乃爲起通靈臺於甘泉上年六十餘髮不白更有少容服食辟穀希復幸女子矣每見羣臣自嘆愚惑天下豈有仙人盡妖妄耳節食服藥差可少病自是亦不服藥而體更瘠瘦二三年中慘慘不樂行幸五柞宮謂霍光曰朕告老矣公可立鈇弋子公善輔之光泣頓首曰陛下尙康豫豈有此邪上曰吾病甚公不知耳三月丙寅上晝臥不覺顏色不異而身已無氣明日色漸變閉目乃發喪殯未央前殿朝晡上祭若有食之常所幸御葬畢悉出茂陵園自婕妤已下上幸之如平生旁人弗見也光聞之乃更出宮人增爲五百人因是遂絕

漢班固撰

漢武故事終

欽定四庫全書提要

艮嶽記一卷

宋張溆撰溆有會稽續志已著錄是書取徽宗御製艮嶽記及蜀僧祖秀所作華陽宮記各摭其略首敘朱勔擾民之事又稱越十年金人南侵臺榭宮室悉皆拆毀官不能禁其大意亦與祖秀同耳

古今說海

良嶽記

說纂二逸事二

徽宗登極之初皇嗣未廣有方士言京城東北隅地協堪輿但形勢稍下儻少增高之則皇嗣繁衍矣上遂命土培其岡阜使稍加於舊矣而果有多男之應自後海內又安朝廷無事上頗畱意苑囿政和間遂卽其地大興工役築山號壽山良嶽命宦者梁師成專董其事時有朱勔者取浙中珍異花木竹石以進號曰花石綱專置應奉局於平江所費動以億萬計調民搜巖剔藪幽隱不置一花一木曾經黃封護視稍不謹則加之以罪斲山輦石雖江湖不測之淵力不可致者百計以出之至名曰神運舟楫相繼日夜不絕廣濟四指揮盡以充輓士猶不給時東南監司郡守二廣市舶率有應奉又有不待旨但進物至都計會宦者以獻者大率靈璧太湖諸石二浙奇竹異花登萊文石湖湘文竹四川佳果異木之屬皆越海度江鑿城郭而至後上亦知其擾稍加禁戢獨許朱勔及蔡攸入貢竭府庫之積聚萃天下之伎藝凡六載而始成亦呼爲萬歲山奇花美木珍禽異獸莫不畢集飛樓傑觀雄偉瓌麗極於

此矣越十年金人犯闕大雪盈尺詔令民任便斫伐爲薪是日百姓奔往無慮十萬人臺榭宮室悉皆拆毀官不能禁也予頃讀國史及諸傳記得其始末如此每恨其他不得而詳後得徽宗御製記文及蜀僧祖秀所作華陽宮記讀之所謂壽山良嶽者森然在目也因各摭其略以備遺忘云御製良嶽記略曰於是按圖度地庀徒僇工累土積石設洞庭湖口絲谿仇池之深淵與泗濱林慮靈璧芙蓉之諸山最瓌奇特異瑤琨之石卽姑蘇武林明越之壤荆楚江湘南粵之野移枇杷橙柚橘柑椰栝荔枝之木金峨玉羞虎耳鳳尾素馨渠那茉莉含笑之草不以土地之殊風氣之異悉生成長養於雕闌曲檻而穿石出罅岡連阜屬東西相望前後相續左山而右水沿溪而傍隴連綿而彌滿吞山懷谷其東則高峯峙立其下植梅以萬數綠萼承趺芬芳馥郁結構山根號綠萼華堂又旁有承嵐崑雲之亭有屋內方外圓如半月是名書館又有八仙館屋圓如規又有紫石之巖祈眞之磴攬秀之軒龍吟之堂其南則壽山嵯峨兩峯並峙列嶂如屏瀑布下入鴈池池水清泚漣漪鳧雁浮泳水面棲息石間不可勝計其上亭曰嚶嚶北直絳霄樓峯巒崛起千疊萬復不知其幾十里

而方廣兼數十里其西則參朮杞菊黃精芎藭被山彌塢中號藥寮又禾麻菽麥黍豆稊稭築室若農家故名西莊上有亭曰巢雲高出峯岫下視羣嶺若在掌上自南徂北行岡脊兩石間綿亘數里與東山相望水出石口噴薄飛注如獸面名之曰由龍淵濯龍峽蟠秀練光跨雲亭羅漢巖又西半山間樓曰倚翠青松蔽密布於前後號萬松嶺上下設兩關出關下平地有大方沼中有兩洲東爲蘆渚亭曰浮陽西爲梅渚亭曰雲浪沼水西流爲鳳池東出爲研池中分二館東曰流碧西曰環山館有閣曰巢鳳堂曰三秀以奉九華玉真安妃聖像東池後結棟山下曰揮雲廳復由嶺道盤行縈曲捫石而上旣而山絕路隔繼之以木棧倚石排空周環曲折有蜀道之難躋攀至介亭此最高於諸山前列巨石凡三丈許號排衙巧怪巉巖藤蘿蔓衍若龍若鳳不可殫窮麓雲半山居右極目蕭森居左北俯景龍江長波遠岸彌十餘里其上流注山間西行潺湲爲漱玉軒又行石間爲煉丹亭凝觀圖山亭下視水際見高陽酒肆清斯閣北岸萬竹蒼翠鬱鬱仰不見天有勝雲菴躡雲臺消閒館飛岑亭無雜花異木四面皆竹也又支流爲山莊爲回溪自山蹊石罅攀條下平陸中立而

四顧則巖峽洞穴亭閣樓觀喬木茂草或高或下或遠或近一出入一榮一彫四面周匝徘徊而仰顧若在重山大壑深谷幽巖之底不知京邑空曠坦蕩而平夷也又不知郭郭寰會紛萃而填委也眞天造地設神謀化力非人所能爲者此舉其槩槩焉祖秀華陽宮記曰政和初天子命作壽山良嶽於禁城之東陬詔闍人董其役舟以載石輿以輦土驅散軍萬人築岡阜高十餘仞增以太湖靈壁之石雄拔峭峙功奪天造石皆激怒觝觸若踞若齧牙角口鼻首尾爪距千態萬狀殫奇盡怪輔以礮木纏藤雜以黃楊對青竹蔭其上又隨其斡旋之勢斬石開徑憑險則設磴道飛空則架棧閣仍於絕頂增高樹以冠之搜遠方珍材盡天下蠹工絕伎而經始焉山之上下致四方珍禽奇獸動以億計猶以爲未也鑿池爲溪澗疊石爲隄捍任其石之怪不加斧鑿因其餘土積而爲山山骨暴露峯稜如削飄然有雲姿鶴態曰飛來峯高於雉堞翻若長鯨腰徑百尺植梅萬本曰梅嶺接其餘岡種丹杏鴨脚曰杏岫又增土疊石間畱隙穴以栽黃楊曰黃楊巘築修岡以植丁香積石其間從而設險曰丁嶂又得頰石任其自然增而成山以椒蘭雜植於其下曰椒崖接水之末增土

爲大陂從東南側栢枝榦柔密揉之不斷葉葉爲幢蓋鸞鶴蛟龍之狀動以萬數曰龍栢坡循壽山而西移竹成林復開小徑至百數步竹有同本而異榦者不可紀極皆四方珍貢又雜以對青竹十居八九曰斑竹麓又得紫石滑淨如削面徑數仞因而爲山貼山卓立山陰置木櫃絕頂開深池車駕臨幸則驅水工登其頂開閘注水而爲瀑布曰紫石壁又名瀑布屏從良嶽之麓琢石爲梯石皆溫潤淨滑曰朝真磴又於洲上植芳木以海棠冠之曰海棠川壽山之西別治園囿曰藥寮其宮室臺榭卓然著聞者曰瓊津殿絳霄樓綠萼華堂築臺高千仞周覽都城近若指顧造碧虛洞天萬山環之開三洞爲品字門以通前後苑建八角亭於其中央榭椽窗楹皆以瑪瑙石間之其地琢爲龍礎導景龍江東出安遠門以備龍舟行幸東西擷景二園西則溯舟造景龍門以幸曲江池亭復自瀟湘江亭開開通金波門北幸擷芳苑隄外築壘衛之瀕水蒔絳桃海棠芙蓉垂楊略無隙地又於舊地作野店麓治農圃開東西二關夾懸巖磴道隘迫石多峯稜過者膽戰股栗凡自苑中登羣峯所出入者此二關而已又爲勝遊六七日躍龍澗漾春陂桃花開鴈池迷真洞其餘勝跡不可

殫紀工已落成上名之曰華陽宮然華陽大抵衆山環列於其中得平蕪數十頃以治園圃以闢宮門於西入徑廣於馳道左右大石皆林立僅百餘株以神運昭功敷慶萬壽峯而名之獨神運峯廣百圍高六仞錫爵盤固侯居道之中束石爲亭以庇之高五十尺御製記文親書建三丈碑附於石之東南陬其餘石或若羣臣入侍帷幄正容凜若不可犯或戰栗若敬天威或奮然而趨又若僂僂趨進其怪狀餘態娛人者多矣上旣悅之悉與賜號守吏以奎章畫列於石之陽其他軒榭庭徑各有巨石棋列星布並與賜名惟神運峯前巨石以金飾其字餘皆青黛而已此所以第其甲乙者乃命羣峰其略曰朝日昇龍望雲坐龍矯首玉龍萬壽老松棲霞捫參銜日吐月排雲衝斗雷門月窟蟪螭坐獅堆青凝碧金鰲玉龜疊翠獨秀棲煙暉雲風門雷穴玉秀玉寶銳雲巢鳳雕琢渾成登封日觀蓬瀛須彌老人壽星卿雲瑞靄溜玉噴玉蘊玉琢玉積玉疊玉叢秀而在於渚者曰翔鱗立於渚者曰舞仙獨踞洲中者曰玉麒麟冠於壽山者曰南屏小峰而附於池上者曰伏犀怒猊儀鳳鳥龍立於沃泉者曰畱雲宿霧又爲藏煙谷滴翠巖搏雲屏積雪嶺其間黃石仆於亭際者曰抱

犢天門又有大石二枚配神運峯異其居以壓衆石作亭庇之寘於寰春堂者曰玉京獨秀太平巖寘於綠萼華堂者曰卿雲萬態奇峯括天下之美藏古今之勝於斯盡矣靖康元年閏十一月大梁陷都人相與排墻避虜於壽山艮嶽之顛時大雪新霽丘壑林塘傑若畫本凡天下之美古今之勝在焉祖秀周覽累日咨嗟驚愕信天下之傑觀而天造有所未盡也明年春復遊華陽宮而民廢之矣

宋張溥撰

艮嶽記終

欽定四庫全書提要

青溪寇軌一卷

宋方勺撰勺字仁聲婺州人元祐中蘇軾知杭州值省試管薦送之浙江通志載潘良貴之言稱其超然遐舉神情散朗如晉宋間高士似以隱遯終身者而所作泊宅編中記虔州安遠龍南二縣有瘴因自述其管勾常平季點到邑事則亦曾官於江右也是編記宣和二年青溪伏寇方臘作亂童貫譚稹等討平之事原載勺泊宅編中曹溶摘入學海類編因改題此名所述睦州之陷及譚稹之爲兩浙制置使劉延慶王稟王渙楊維忠之功皆與宋史不合蓋傳聞異詞後附論二則其一追述魔教之始不署姓名其一署曰容齋追敘致亂之故甚詳併載韓世忠時爲王淵裨將潛行谿谷問野婦得徑則挺身直前度險數重搗其穴格殺數十人擒臘以出又稱泊宅翁之志

寇軌也蘄王猶未知名故略之且時宰猶多在朝臘等陰謀亦多忌諱故削不載今表而出之以戒後世司民者容齋爲洪邁之號疑或邁所附題歟宋史韓世忠傳載其平青溪之功與此所載合當卽據此載入也

古今說海

青溪寇軌

說纂三逸事三

宣和二年十月睦州青溪縣塌村居人方臘託左道以惑衆知縣事承議郎陳光不卽鉏治臘自號聖公改元永樂置偏裨將以巾飾爲別自紅巾而上凡六等無甲冑惟以鬼神詭秘事相扇搖數日聚惡少千餘焚民居掠金帛子女提點刑獄張苑通判州事葉居中不能招致欲盡殺乃已故賊得脅虜良民爲兵旬日有衆數萬十一月二十九日將領蔡遵與戰於息坑死之遂陷青溪縣十二月四日陷睦州初七日天章閣待制欵守曾孝蘊以京東賊宋江等出青齊濟濮間有旨移知青社一宗室通判州事守禦無策十三日又陷欵州乘勢取桐廬新城富陽等縣二十九日進逼杭州知州事趙霆棄城走州卽陷節制直龍圖閣陳建廉訪使者趙約被害賊縱火六日官吏居民死者十三朝廷遣領樞密院童貫常德軍節度使譚稹二中貴率禁旅及京畿關右河東蕃漢兵制置江淮二浙明年正月二十四日賊將七佛引衆六萬攻秀州統軍王子武聚兵與州民登城固守屬大兵至開門表裏合擊斬首九千

築京觀五賊退據杭州二月七日前鋒至清河堰賊列陣以待王師水陸並進戰六日斬賊二萬十八日再火官舍學宮府庫與僧民之居經夕不絕翌日宵遁大兵入城當是時少保劉延慶由江東入至宣州涇縣遇賊僞八大王斬五千級復歙州出賊背統制王稟王渙楊惟忠辛興宗自杭還陸取睦州與江東兵合斬獲七百里生擒方臘及僞相方肥等妻印子毫二太子等凡五十二人毫二太子其子之號於梓桐石穴中殺賊七萬招來老幼四十餘萬復使歸業四月二十六日也餘黨走衢婺而蘭溪縣靈山賊朱言吳邦起應之據處州而越州剡縣魔賊仇道人台州仙人呂師囊方品山賊陳十四公等起兵掠溫台諸縣四年三月討平之是役也用兵十五萬斬賊百餘萬自出師至凱旋凡四百五十日收杭睦歙處衢婺六州與五十二縣所殺平民不下二百萬始唐永徽四年睦州女子陳碩真反自稱文佳皇帝婺州刺史崔義玄平之故梓桐相傳有天子基萬年樓方臘因得憑藉以起又以沙門寶誌讖記誘惑愚民而貧窮游手之徒相乘爲亂青溪爲睦大邑梓桐幫源等號山谷幽僻處東北趨睦西近歙民物繁庶有漆楮林木之饒富商巨賈多往來江浙地勢迂險賊一

且焚蕩無一存者羣黨據險以守因謂之洞而浙人安習太平不識兵革一聞金鼓聲則斂手聽命不逞小民往往反爲賊鄉導劫富室殺官吏士人以徼利渠魁未授首間所掠婦女自洞逃出俛而雉經於林中者由湯岳榴樹嶺一帶凡八十五里九村山谷相望不知其數會稽進士沈傑嘗部民深入賊境親覩其事爲余言賊之始末因稽合衆論據其實著於篇青溪知縣陳光旣坐不治賊就戮朝廷改睦爲嚴州歙爲徽州青溪界至歙州路皆鳥道縈紆兩旁峭壁萬仞僅通單車方臘之亂曾待制出守但以兩崖上駐兵防遏下瞰來路雖蚍蜉之微皆可數賊亦不敢犯境宋江擾京東曾公移守青社掌兵者以霧毒爲辭移屯山谷間州遂陷後漢張角張燕輩託天師道陵爲遠祖立祭酒治病使人出米五斗而病遂愈謂之五斗米道至其滋盛則剽劫州縣無所不爲其流至今喫菜事魔夜聚曉散者是也凡魔拜必北向以張角實起於北方觀其拜足以知其所宗原其平時不飲酒食肉甘枯槁趨靜默若有志於爲善者然男女無別不事耕織衣食無所得敗務攘斂以挺亂其可不早辨之乎有以其疑似難識欲痛繩之恐其滋蔓因置而不問馴致禍

變則陳光之於方臘是也有舍法令一切弗問但魔迹稍露則使屬邑盡驅之死地
務絕其本源肅清境內而此曹急則據邑聚而反則越守劉鞫之於仇賊是也仇破
新昌上虞 此風日熾殆未易察也始知能上體國禁之嚴下念愚民之無辜迷入於
凡三縣 此道不急不怠銷患於冥冥之中者良有司也

容齋逸史曰甚哉小人患得患失貽禍之深也初元祐間宣仁太后臨朝天下大政
事皆太后與二三大臣議可而行時雖天下稱治哲宗內弗平也一旦太后崩方欲
悉反其政以攄宿憤而小人揣知上旨遂引呂武爲喻上益惑焉明年改元紹聖而
熙豐羣邪彙進矣是後天下監司牧守無非時宰私人所在貪墨民不聊生迨徽廟
繼統蔡京父子欲固其位乃倡豐亨豫大之說以恣蠱惑童貫遂開造作局於蘇杭
以制御器又引吳人朱勗進花石媚上上心既侈歲加增焉舳舻相銜於淮汴號花
石綱至截諸道糧餉綱旁羅商舟揭所貢暴其上篙師柁工倚勢貪橫凌轢州縣道
路以目其尤重者漕河弗能運則取道於海每遇風濤則人船皆沒枉死無算江南
數十郡深山幽谷搜剔殆遍或有奇石在江湖不測之淵百計取之必得乃止程限

慘刻無間寒暑士庶之家一石一木稍堪玩者卽領健卒直入其家用黃帕覆之指爲御物又不卽取因使護視微不謹則重譴隨之及啓行必發房徹牆以出由是人有一物小異共指爲不祥惟恐芟夷之不速民預是役者多鬻田宅子女以供其須思亂者益衆初方臘生而數有妖異一日臨溪顧影自見其冠服如王者由此自負遂託左道以惑衆縣境梓桐幫源諸洞皆落山谷幽險處民物繁夥有漆楮松杉之饒商賈輻輳臘有漆園造作局屢酷取之臘怨而未敢發會花石綱之擾遂因民不忍陰取貧乏游手之徒賑恤結納之衆心旣歸乃椎牛釀酒召惡少之尤者百餘人會飲酒數行臘起曰天下國家本同一理今有子弟耕織終歲勞苦少有粟帛父兄悉取而靡蕩之稍不如意則鞭笞酷虐至死弗恤於汝甘乎皆曰不能臘曰靡蕩之餘又悉舉而奉之仇讐仇讐賴我之資益以富實反見侵侮則使子弟應之子弟力弗能支則譴責無所不至然歲奉仇讐之物初不以侵侮廢也於汝甘乎皆曰安有此理臘涕泣曰今賦役繁重官吏侵漁農桑不足以供應吾儕所賴爲命者漆楮竹木耳又悉科取無錙銖遺夫天生烝民樹之司牧本以養民也乃暴虐如是天人之

心能無愠乎且聲色狗馬土木禱祠甲兵花石糜費之外歲賂西北二虜銀絹以百萬計皆吾東南赤子膏血也二虜得此益輕中國歲歲侵擾不已朝廷奉之不敢廢宰相以爲安邊之長策也獨吾民終歲勤動妻子凍餒求一日飽食不可得諸君以爲何如皆憤憤曰惟命臘曰三十年來元老舊臣貶死殆盡當軸者皆齷齪邪佞之徒但知以聲色土木淫蠱上心耳朝廷大政事一切弗恤也在外監司牧守亦皆貪鄙成風不以地方爲意東南之民苦於剝削久矣近歲花石之擾尤所弗堪諸君若能仗義而起四方必聞風響應旬日之間萬衆可集守臣聞之固將招徠商議未便申奏我以計縻之延滯一兩月江南列郡可一鼓下也朝廷得報亦未能決策發兵計其遷延集議亦須月餘調集兵食非半年不可是我起兵已首尾期月矣此時當已大定無足慮也况西北二虜歲幣百萬朝廷軍國經費千萬多出東南我既據有江表必將酷取於中原中原不堪必生內變二虜聞之亦將乘機而入腹背受敵雖有伊呂不能爲之謀也我但畫江而守輕徭薄賦以寬民力四方孰不斂衽來朝十年之間終當混一矣不然徒死於貪吏耳諸君其籌之皆曰善遂部署其衆千餘人

以誅朱勔爲名見官吏使人皆殺之民方苦於侵漁果所在響應數日有衆十萬遂連陷郡縣數十衆殆百萬四方大震時朝廷方約女真夾攻契丹取燕雲地兵食皆已調集待命適聞臘起遂以童貫爲江淮荆浙宣撫使移師南下臘不虞如是速也貫至蘇州始承詔罷造作局及御前綱運并木石彩色等場前至秀州累敗賊鋒追至幫源洞賊尙二十餘萬與官軍力戰而敗深據巖穴爲三窟諸將莫知所入韓蘄王世忠時爲王淵裨將潛行谿谷問野婦得徑卽挺身直前度險數重搏其穴格殺數十人擒臘以出遂併取臘妻子符印及方肥等其黨皆潰前後所戕人命數百萬江南由是凋瘵不復昔日之十一矣迨建炎南渡經費多端愈益窮困不可復支向非臘之耗亂江淮二浙公私充實南渡後或可藉爲恢復之資亦未可知也噫臘之耗亂可哀也已然所以致是者誰歟泊宅翁之志寇軌也蘄王猶未知名故略之且時宰猶多在朝臘黨陰謀語多忌諱亦削不載吾故表而出之以戒後世司民者附錄

喫菜事魔法禁甚嚴有犯者家人雖不知情亦流遠方財產半給告人餘皆沒官而

近時事者益衆始自福建流至溫州遂及二浙睦州方臘之亂其徒處處相煽而起聞其法斷葷酒不事神物祖先不會賓客死則袒葬方歛盡飾衣冠其徒使二人坐於尸傍其一問曰來時有冠否則答曰無遂去其冠次問衣履逐一去之以至於盡乃曰來時何有曰有包衣則以布囊盛尸焉云事後致富小人無識不知絕酒肉燕祭厚葬自能積財也又始投其黨有甚貧者衆率財以助積微以至於小康矣凡出入經過不必相識黨人皆館穀焉凡物用之無間謂爲一家故有無礙被之說以是誘惑其衆其魁謂之魔王右者謂之魔王各有誘化且望人出四十九錢於魔王處燒香魔王則聚所得緡錢以時納於魔王歲獲不貲云亦誦金剛經取以色見我爲邪道故不事神佛但拜日月以爲眞佛其說不經如是法平等無有高下則以無字連上句大抵多如此解釋俗訛以魔王爲麻謂其魁爲麻黃或云易魔王之名也其初授法設誓甚重然以張角爲祖雖死於湯鑊終不敢言角字傳言何執中守官台州州獲事魔之人勘鞠久不能得或云何處州龍泉人其鄉邑多有事者必能察其虛實乃委之窮究何以雜物百數問能識其名則非是而置一羊角其間餘皆名之至

角則不言遂決其獄如不事祖先喪葬之類已害風俗而又謂人生爲苦若殺之是救其苦也謂之度人度人多者則可成佛

青溪寇軌終

欽定四庫全書提要

海山記一卷迷樓記一卷開河記一卷

三書並載明吳瑄古今逸史中不著撰人名氏海山記述隋煬帝西苑事所錄煬帝諸歌其調乃唐李德裕所作望江南調段安節樂府雜錄述其緣起甚詳大業中安有是體考劉斧青瑣高議後集載有此記分上下二篇其文較詳蓋宋人所依託此本刪併爲一卷益僞中之僞矣迷樓記亦見青瑣高議載煬帝幸江都唐帝入京見迷樓云云竟以迷樓爲在長安乖謬殊甚開河記述麻叔謀開汴河事詞尤鄙俚皆近於委巷之傳奇同出依託不足道也

古今說海

煬帝海山記

說纂四 逸事四

隋煬帝生時有紅光燭天里中牛馬皆鳴先是獨孤后夢龍出身中飛高十餘里龍墮地尾輒斷以告文帝帝沉吟默塞不答帝三歲戲於文帝前文帝抱之玩視甚久曰是兒極貴恐破吾家自茲雖愛帝而亦不快於帝帝十歲好觀古今書傳至於方藥天文地理伎藝術數無不通曉然而性褊急陰賊刻忌好鈎索人情深淺時楊素有戰功方費用事帝傾意結之文帝得疾內外莫有知者帝坐便室召素謀曰君國之元老能了吾家事者君也乃私執素手曰使我得志我亦終身報公素曰待之當自有計素入問疾文帝見素起坐謂素曰吾常親鋒刃冒矢石出入生死與子同之方享今日之貴吾自惟不免此疾不能臨天下汝立吾族中人吾不諱汝立吾兒勇爲帝汝倍吾言吾去世亦殺汝此事吾不語人素曰國本不可屢易臣不敢奉詔文帝忿懣乃大呼左右曰召吾兒勇來乃氣哽塞回面向之不言素乃出語帝曰事未可更待之有頃左右出報素曰帝呼不應喉中嚙嚙有聲帝拜素曰以終身累公素

急入帝已崩矣乃不發喪明日素袖遺詔立帝時百官猶未知素執圭謂百官曰大行遺詔立帝有不從者戮於此左右扶帝上殿帝足弱欲倒者數四不能上素下去左右以手扶接帝帝援之乃上百官莫不嗟嘆素歸謂家人輩曰小兒子吾已提起教作大家卽不知了當得否素恃有功見帝多呼爲郎君時宴內宮宮人偶覆酒污素衣素怒叱左右引下加撻焉帝頗惡之隱忍不發一日帝與素釣魚於池並坐左右張傘以遮日帝起如廁回見素坐楮傘下風骨秀異堂堂然帝大忌之帝多欲有所爲素輒請而抑之由是愈有害素意會素死帝曰使素不死夷其九族先素欲入朝出見文帝執金鉞逐之曰此賊吾欲立勇汝竟不從吾言今必殺汝素驚呼入室召子弟二人而語曰吾必死矣出見文帝語不移時素死帝自素死益無憚乃關地下境內所有鳥獸草木驛至京師天下共進花木鳥獸魚蟲莫知其數此不具載詔定西苑十六院名景明一迎暉二棲鸞三晨光四明霞五翠華六文安七積珍八影紋九儀鳳十仁智十一清修十二寶林十三和明十四綺陰十五降陽十六皆帝自

製名院有二十人皆擇宮中佳麗謹厚有容色美人實之每一院選帝常幸御者爲之首每院有宦者主出入易市又鑿五湖每湖四方十里東曰翠光湖南曰迎陽湖西曰金光湖北曰潔水湖中曰廣明湖湖中積土石爲山構亭殿屈曲環遶澄碧皆窮極人間華麗又鑿北海周環四十里中有三山效蓬萊方丈瀛洲上皆臺榭廻廊水深數丈開溝通五湖北海溝盡通行龍鳳祠帝多泛東湖因製湖上曲望江南八闋云○湖上月偏照列仙家水浸寒光鋪枕簟浪搖晴影走金蛇偏稱泛靈槎 光景好輕彩望中斜清露冷侵銀兔影西風吹落桂枝花開宴思無涯○湖上柳煙裏不勝攏宿霧洗開明媚眼東風搖弄好腰枝煙雨更相宜 環曲岸陰覆畫橋低線拂行人春晚後絮飛晴雪暖風時幽意更依依○湖上雪風急墮還多輕片有時敲竹戶素華無韻入澄波望外玉相磨 湖水遠天地色相和仰面莫思梁范賦朝來且聽玉人歌不醉擬如何○湖上草碧翠浪通津修帶不爲歌舞緩濃鋪堪作醉人茵無意襯香衾 晴霽後顏色一般新游子不歸生滿地佳人遠意寄青春畱咏卒難伸○湖上花天水浸靈芽淺蕊水邊勻玉粉濃苞天外剪明霞只在列仙家 開

爛熳挿鬢若相遮水殿春寒幽冷艷玉軒晴照暖添華清賞思何賒○湖上女精選
正輕盈猶恨乍離金殿侶相將盡是采蓮人清唱漫頻頻 軒內好嬉戲下龍津玉
管朱絃聞盡夜踏青鬪草事青春玉輦從羣真○湖上酒終日助清歡檀板輕聲銀
甲緩嚙浮香米玉蛆寒醉眼暗相看 春殿晚仙艷奉盃盤湖上風光真可愛醉鄉
天地就中寬帝主正清安○湖上水流遶禁園中斜日緩搖清翠動落花香暖衆紋
紅蘋末起清風 閒縱目魚躍小蓮東泛泛輕搖蘭棹穩沉沉寒影上仙宮遠意更
重重帝常遊湖上多令宮中美人歌唱此曲大業六年後苑草木鳥獸繁息茂盛桃
蹊李徑翠陰交合金猿青鹿動輒成羣自大內開爲御道直通西苑夾道植長松高
柳帝多幸苑中去來無時侍御多夾道而宿帝往往中夜卽幸焉一夕帝泛舟遊北
海與宦人十數輩升海山是時月色朦朧晚風輕軟浮浪無聲萬籟俱寂恍惚聞水
上有一小舟祇容兩人帝謂爲十六院中美人泊至首一人先登贊唱陳後主謁帝
帝亦忘其死帝幼年與後主甚善乃起迎之後主再拜帝亦鞠躬勞謝旣坐後主曰
憶昔與帝同隊遊戲情愛甚於同氣今陛下富有四海令人欽服始者謂帝將致理

於三王之上今乃甚取當時之樂以快平生無甚美事聞陛下已開隋渠引洪河之水東遊維揚因作詩來奏乃探懷出詩上帝詩曰隋室開茲水初心謀大賒一千里力役百萬民吁嗟水殿不復返龍舟成小瑕溢流隨陡岸濁浪噴黃沙兩人迎客至三月柳飛花日脚沉雲外榆梢噪暝鴉如今遊子俗異日便天家且樂人間景休尋海上槎人喧舟艤岸風細錦帆斜莫言無後利千古壯京華帝觀詩拂衣怒曰死生命也興亡數也爾安知吾開河爲後人之利帝怒叱之後主曰子之壯氣能得幾日其終始更不若吾帝乃起逐之後主走曰且去且去後一年吳公臺下相見乃沒於水際帝方悟其死兀然不自知驚悸移時一日明霞院美人楊夫人喜報帝曰酸棗邑所進玉李一夕忽長清陰數畝帝沉默甚久曰何故而忽茂夫人云是夕院中人聞空中若有千百人語言云李木當茂洎曉看之已茂盛如此帝欲伐去左右或奏曰木德來助之應也又一夕晨光院周夫人來奏云院中楊梅一夕忽爾繁盛帝喜問曰楊梅之茂能如玉李乎或曰楊梅雖茂終不敵玉李之盛帝往兩院觀之亦自見玉李繁茂後梅李同時結實院妃來獻帝問二果孰勝院妃曰揚梅雖好味頗清

酸終不若玉李之甘苑中人多好玉李帝歎曰惡梅好李豈人情哉天意乎後帝將崩揚州一日院妃報楊梅已枯死帝果崩於揚州異乎一日洛水漁者獲生鯉一尾金鱗赭尾鮮明可愛帝問漁者之姓氏解未有名帝以朱筆於魚額上題解生字以記之乃放之北海中後帝幸北海其鯉已長丈餘浮水見帝其魚不沒帝與蕭后及諸院妃嬪同看魚之額朱字尙存惟解字無半尙隱隱角字存焉蕭后曰鯉有角龍也帝曰朕爲人主豈不知此意遂引弓射之魚乃沉大業四年道州貢矮民王義眉目濃秀應對甚敏帝尤愛之常從帝遊終不得入宮曰爾非宮中物也義乃自宮帝由是愈加憐愛得出入內寢義多臥御榻下帝遊湖海回多宿十六院一夕帝中夜潛入棲鸞院時夏氣暄煩院妃慶兒臥於簾下初月照軒頗明朗慶兒睡中驚魘若不救者帝使義呼慶兒帝自扶起久方清醒帝曰汝夢中何故而如此慶兒曰妾夢中如常時帝握妾臂遊十六院至第十院帝入院坐殿上俄時火發妾乃奔走回視帝坐烈焰中驚呼人救帝久方睡覺帝自強解曰夢死得生火有威烈之勢吾居其中得威者也大業十年幸江都被弑帝入第十院居火中此其應也龍舟爲楊玄感

所燒後勅揚州刺史再造制度又華麗仍長廣於前舟江都來進帝東幸維揚後宮十六院皆隨行西苑令馬守忠別帝曰願陛下早還都輦臣整頓西苑以待乘輿之來西苑風景臺殿如此陛下豈不思戀舍之而遠遊也又泣下帝亦愴然謂守忠曰爲吾好看西苑無令後人笑吾不解裝景趣也左右甚疑訝帝御龍舟中道夜半聞歌者甚悲其辭曰我兄征遼東餓死青山下今我挽龍舟又困隋隄道方今天下饑路糧無些小前去三千程此身安可保寒骨枕荒沙幽魂泣煙草悲損門內妻望斷吾家老安得義男兒焚此無主屍引其孤魂回負其白骨歸帝聞其歌遽遣人求其歌者至曉不得其人帝頗徬徨通夕不寐揚州朝百官天下朝貢使無一人至者有來者在途遭兵奪其貢物帝猶與羣臣議詔十三道起兵誅不朝貢者帝知世祚已去意欲遂幸永嘉羣臣皆不願從帝未遇害前數日帝亦微識玄象多夜起觀天乃召太史令袁充問曰天象如何充伏地泣涕曰星文大惡賊星逼帝座甚急恐禍起旦夕願陛下遽修德滅之帝不樂乃起入便殿按膝俛首不語顧王義曰汝知天下將亂乎汝何故省言而不告我也義泣對曰臣遠方廢民得蒙上貢自入深宮久膺

聖澤又常自宮以近陛下天下大亂固非今日履霜堅冰其來久矣臣料大禍事在不救帝曰子何不早告我也義曰臣不早言言即臣死久矣帝乃泣下曰卿爲我陳成敗之理朕貴知也翌日義上書云臣本南楚卑薄之地逢聖明爲治之時不愛此身願從入貢臣本侏儒性尤蒙滯出入左右積有歲華濃被聖私皆踰素望侍從乘輿周旋臺閣臣雖至鄙酷好窮經頗知善惡之本源少識興亡之所以還往民間周知利害深蒙顧問方敢敷陳自陛下嗣守元符體臨大器聖神獨斷諫謀莫從獨發睿謀不容人獻大興西苑兩至遼東龍舟踰於萬艘宮闕徧於天下兵甲常役百萬士民窮乎山谷征遼者百不存十歿葬者十未有一帑藏全虛穀粟湧貴乘輿竟往行幸無時兵人侍從常踰萬人遂令四方失望天下爲墟方今有家之村存者可數子弟死於兵役老弱困於蓬蒿兵屍如嶽餓莩盈郊狗彘厭人之肉鳶魚食人之餘臭聞千里骨積高原膏血草野狐犬盡肥陰風無人之墟鬼哭寒草之下目斷平野千里無煙萬民剝落莫保朝昏父遺幼子妻號故夫孤苦何多饑荒尤甚亂離方始生死孰知人主愛人一何如此陛下恒性毅然孰敢上諫或有鯁言又令賜死臣下

相顧箝結自全龍逢復生安敢議奏左右近臣阿諛順旨迎合帝意造作拒諫皆出此途乃逢富貴陛下惡過從何得聞方今又敗遼師再幸東土社稷危於春雪干戈遍於四方生民已入塗炭官吏猶未敢言陛下自惟若何爲計陛下欲幸永嘉坐延歲月神武威嚴一何銷鑠陛下欲興師則兵吏不順欲行幸則侍衛莫從適當此時如何自處陛下雖欲發憤修德特加愛民聖慈雖切救時天下不可復得大勢已去時不再來巨厦之崩一木不能支洪河已決剝壤不能救臣本遠人不知忌諱事忽至此安敢不言臣今不死後必死兵敢獻此書延頸待盡帝省義奏曰自古安有不亡之國不死之主乎義曰陛下尙猶蔽飾已過陛下常言吾當跨三皇超五帝下視商周使萬世不可及今日其勢如何能自復回都輦乎帝乃泣下再三嘉歎義曰臣昔不言誠愛生也今既具奏願以死謝也天下方亂陛下自愛少選報云義自刎矣帝不勝悲傷命厚葬焉不數日帝遇害時中夜聞外切切有聲帝急起衣冠御內殿坐未久左右伏兵俱起司馬戮攜刃向帝帝叱之曰吾終年重祿養汝吾無負汝汝何負吾帝常所幸朱貴兒在帝傍謂戮曰三日前帝慮侍衛秋寒詔宮人悉絮袍褲

帝自臨視造數千袍兩日畢工前日賜公等豈不知也爾等何敢逼脅乘輿乃大罵
戡戡曰臣實負陛下但今天下俱叛二京已爲賊據陛下歸亦無終臣生亦無門臣
已虧臣節雖欲復已不可得也願得陛下首以謝天下乃攜劍上殿帝復叱曰汝豈
不知諸侯之血入地尙大旱况天子乎戡進帛帝入內閣自經貴兒猶大罵不息爲
亂兵所殺

古今說海

煬帝迷樓記

說纂五 逸事五

煬帝晚年尤沉迷女色他日顧詔近侍曰人主享天下之富亦欲極當年之樂自快其意今天下安富外內無事此吾得以遂其樂也今宮殿雖壯麗顯傲苦無曲房小室幽軒短檻若得此則吾期老於其中也近侍高昌奏曰臣有友項昇浙人也自言能構宮室翌日詔而問之昇曰臣乞先進圖本後數日進圖帝覽大悅卽日詔有司供具材木凡役夫數萬經歲而成樓閣高下軒窻掩映幽房曲室玉欄朱楯互相連屬回環四合曲屋自通千門萬牖上下金碧金虬伏於棟下玉獸蹲於戶傍壁砌生光瑣窻射日工巧之極自古無有也費用金玉帑庫爲之一虛人誤入者雖終日不能出帝幸之大喜顧左右曰使眞仙遊其中亦當自迷也可目之曰迷樓詔以五品官賜昇仍給內庫帛千疋賞之詔選後宮良家女數千以居樓中每一幸有經月而不出是月大夫何稠進御童女車車之制度絕小祇容一人有機處於其中以機礙女之手足女纖毫不能動帝以處女試之極喜召何稠謂之曰卿之巧思一何神妙

如此以千金贈之旌其巧也何稠出爲人言車之機巧有識者曰此非盛滿之器也稠又進轉關車車周挽之可以昇樓閣如行平地車中御女則自搖動帝尤喜悅帝謂稠曰此車何名也稠曰臣任意造成未有名也願賜佳名帝曰卿任其巧意以成車朕得之任其意以自樂可名任意車也何稠再拜而去帝令畫工繪士女會合之圖數十幅懸於閣中其年上官時自江外得替回鑪烏銅屏數十面其高五尺而闊三尺磨以成鑑爲屏可環於寢所詣闕投進帝以屏內迷樓而御女於其中纖毫皆入於鑑中帝大喜曰繪畫得其象耳此得人之眞容也勝繪圖萬倍矣又以千金賜上官時帝日夕沉荒於迷樓罄竭其力亦多倦怠顧謂近侍曰朕憶初登極日多辛苦無睡得婦人枕而藉之方能合目纔似夢則又覺今睡則冥冥不知返近女色則憊何也他日矮民王義上奏曰臣田野廢民作事皆不勝人生於遼曠絕遠之城幸因入貢得備後庭掃除之役陛下特加愛遇臣常自宮以侍陛下自茲出入臥內周旋宮室方今親信無如臣者臣由是竊覽書殿中簡編反覆玩味微有所得臣聞精氣爲人之聰明陛下當龍潛日先帝勤儉陛下鮮親聲色日近善人陛下精實於內

神清於外故日夕無寢陛下自數年聲色無數盈滿後宮日夕游宴自非歲節大辰何常臨御前殿其餘多不受朝設或引見遠人非時慶賀亦日宴坐朝曾未移刻則聖躬起入後宮夫以有限之體而投無盡之慾臣固知其竭也臣聞古者野叟獨歌舞於磐石之上人詢之曰子何獨樂之多也叟曰吾有三樂子知之乎何也人生難遇太平世吾今不見兵革此一樂也人生難得支體完備吾身不殘疾此二樂也人生難得壽吾今年八十矣此三樂也問者歎賞而去陛下享天下之富貴聖貌軒逸龍顏鳳姿而不自愛重其思慮固出於野叟之外臣竊爾微軀難圖報効罔知愚諱上逆天顏因俯伏泣涕帝乃命引起翌日召義詔之曰朕昨夜思汝言極有深理汝眞愛我者也乃命義後宮擇一靜室而帝居其中女皆不得入居二日帝忿然而出曰能悒悒居此乎若此雖壽千萬歲亦安用也乃復入宮宮女無數不得進御者亦極衆後宮侯夫人有美色一日自經於棟下臂懸錦囊中有文左右取以進帝乃詩也自感三首云庭絕玉輦迹芳草漸成窠隱隱聞簫鼓君恩何處多欲泣不成淚悲來翻強歌庭花方爛熳無計奈春何春陰正無際獨步意何如不及閒花草翻承雨

露多看梅二首云砌雪無消日捲簾時自翬庭梅對我有憐意先露枝頭一點春香
清寒艷好誰惜是天真玉梅謝後陽和至散與羣芳自在春粧成云粧成多自惜夢
好却成悲不及楊花意春來到處飛遣意云秘洞扁仙卉雕窻鎖玉人毛君眞可戮
不肯寫昭君自傷云初入承明日深深報未央長門七八載無復見君王春寒入骨
清獨臥愁空房颯履步庭下幽懷空感傷平日新愛惜自待聊非常色美反成棄命
薄何可量君恩實疎遠妾意徒徬徨家豈無骨肉偏親老北堂此方無羽翼何計出
高墻性命誠所重棄割良可傷懸帛朱棟上肝腸如沸湯引頸又自惜有若絲牽腸
毅然就死地從此歸冥鄉帝見其詩反覆傷感帝往視其尸曰此已死顏色猶美如
桃花乃急召中使許廷輔曰朕向遣汝擇後宮女入迷樓汝何故獨棄此人也乃令
廷輔就獄賜自盡厚禮葬侯夫人帝日誦詩酷好其文乃令樂府歌之帝又於後宮
親擇女百人入迷樓大業八年方士進大丹帝服之蕩思愈不可制日夕御女數十
人入夏帝煩躁日引飲幾百杯而渴不止醫丞莫君錫上奏曰帝心脉煩盛眞元太
虛多飲卽大疾生焉因進劑治之仍乞置氷盤於前俾帝日夕朝望之亦治煩燥之

一術也自茲諸院美人各市冰爲盤以望行幸京師冰爲之踴貴藏冰之家皆獲千金大業九年帝將再幸江都有迷樓宮人抗聲夜歌云河南楊柳謝河北李花榮楊花飛去落何處李花結果自然成帝聞其歌披衣起聽召宮女問之云孰使汝歌也汝自爲之邪宮女曰臣有弟在民間因得此歌曰道途兒童多唱此歌帝默然久之曰天啓之也天啓之也帝因索酒自歌云宮木陰濃燕子飛興衰自古漫成悲他日迷樓更好景宮中吐艷戀紅輝歌竟不勝其悲近侍奏無故而悲又歌臣皆不曉帝曰休問他日自知也後帝幸江都唐帝提兵號令入京見迷樓太宗曰此皆民膏血所爲乃命焚之經月火不滅前謠前詩皆見矣方知世代興亡非偶然也

迷樓記終

古今說海

煬帝開河記

說纂六 逸事六

睢陽有王氣出占天耿純臣奏後五百年當有天子興煬帝已昏淫不以爲信時遊木蘭庭命袁寶兒歌柳枝詞因觀殿壁上有廣陵圖帝瞪目視之移時不能舉步時蕭后在側謂帝曰知他是甚圖畫何消皇帝如此掛意帝曰朕不愛此畫只爲思舊遊之處於是帝以左手凭后肩右手指圖上山水及人煙村落寺宇厯厯皆如目前謂后曰朕昔征陳主時遊此豈期久有臨軒萬機在躬便不得豁於懷抱也言訖聖容慘然后曰帝意在廣陵何如一幸帝聞心中豁然翌日與大臣言欲至廣陵旦夕游賞當此之時以雲煙爲靈景視榮貴若陳腐議欲泛巨舟自洛入河自河達海入淮至廣陵羣臣皆言似此程途不啻萬里又孟津水緊滄海波深若泛巨舟事恐不測時有諫議大夫蕭懷靜乃蕭后弟奏曰臣聞秦始皇時金陵有王氣始皇使人鑿斷砥柱王氣遂絕今睢陽有王氣又陛下喜在東南欲泛孟津又慮危險况大梁西北有故河道乃是秦時王離吠水灌大梁之處欲乞陛下廣集兵夫於大梁起首開掘西

自河陰引孟津水入東至淮放孟津水出此間地不過千里況於睢陽境內過一則路達廣陵二則鑿穿王氣帝聞奏大喜羣臣皆默帝乃出勅朝堂有諫開河者斬之詔以征北大總管麻叔謀爲開河都護以蕩寇將軍李淵爲副使淵稱疾不赴卽以左屯衛將軍令狐達代李淵爲開渠副使都督自大梁起首於樂臺之北建修渠所署命之爲卞渠

古祗有此卞字開封城乃卞邑

因名其府署爲卞渠上源傳舍也詔發天下丁夫男

年十五以上五十以下者皆至如有隱匿者斬三族帝以河水經於卞乃賜卞字加水丁夫計三百六十萬人乃更五家出一人或老或幼或婦人等供饋飲食又令少年驍卒五萬人各執杖爲吏如節級隊長之類共五百四十三萬餘人叔謀乃令三分中取一分人自上源而西至河陰通連古河道

乃王離浸城處

迤邐趨愁思臺而至北去

又令二分丁夫自上源驛而東去乃隋大業五年八月上旬建功畚鍤旣集東西橫布數千里纔開斷未及丈餘得古堂室可數間瑩然肅靜漆燈晶煌照耀如晝四壁皆有彩畫花竹龍鬼之像中有棺柩如豪家之葬其從功吏聞於叔謀命啓棺一人容貌如生肌膚潔白如玉而肥其髮自頭出而覆其面過腹胸下略其足倒生而上

及其背下而方止搜得一石銘上有字如蒼頡鳥跡之篆乃召夫中有識者免其役
有一下邳民讀曰我是大金仙死來一千年數滿一千年背下有流泉得逢麻叔謀
葬我在高原髮長至泥丸更候一千年方登兜率天叔謀乃自備棺槨葬於城西隅
之地今大佛寺是也次開掘陳畱帝遣使馳御署玉祝并白璧一雙具少牢之奠祭於畱侯
廟以假道祭訖忽有大風出於殿內窻牖間吹鑠人面使者退自陳畱果開掘東去
往來負擔拖鋏者風馳電激遠近之人如蜂屯聚既達雍丘時有一夫乃中牟人偶
患傴僂之疾不能前進墮於隊後伶仃而行是夜月色澄靜聞呵殿聲甚嚴夫鞠躬
俟道左良久見清道繼至儀衛周旋一貴人戴侯冠衣王者衣乘白馬命左右呼夫
至前謂曰與我言爾十二郎還白璧一雙爾當賓於天煬帝有天言畢取璧以授夫
跪受訖欲再拜貴人躍馬西去屈雍丘以獻於叔謀熟視乃帝獻畱侯物也詰其夫
夫具道叔謀性貪乃匿璧又不曉其言慮夫洩於外乃斬以滅口然後於雍丘至大
林林中有小祠廟叔謀訪問村叟曰古老相傳呼爲隱士墓其神甚靈叔謀不以爲
信將塋域發掘數尺忽鑿一竅嵌空羣夫下視有燈火熒熒無人敢入者乃指使將

官武平郎將狄去邪者請入探之叔謀喜曰眞荊聶之輩也命繫去邪腰下鈞約數十丈方及地去邪解其索行約百步入一石室東北各有四石柱鐵索二條繫一獸大如牛熟視之一巨鼠也須臾石室之西有一石門洞開一童子出曰子非狄去邪乎曰然也童子曰皇甫君望子已久乃引入見一人服朱衣頂雲冠居高堂之上去邪再拜其人不言亦不答拜綠衣吏引去邪立於堂之西階下良久堂上人呼力士牽取阿麼來阿麼煬帝小字武夫數人形質醜異魁偉控所見大鼠至去邪本乃廷臣知帝小字莫究其事但屏氣而立堂上人責鼠曰吾遣爾暫脫皮毛爲中國主何虐民害物不遵天道鼠但點頭搖尾而已堂上人益怒令武士以大棒撻其腦一擊而碎有聲如墻崩其鼠大叫若雷吼然方欲舉杖再擊俄一童子捧天符而下堂上驚躍降陛俯伏聽命童子乃宣言曰阿麼數本一紀今已七年更候五年當以練巾繫頸而死童子去堂上人復令繫鼠於舊室中堂上人謂去邪曰與吾語麻叔謀謝爾伐吾塋域來歲奉爾二金刀勿謂輕酬也言訖綠衣吏引去邪於他門出約行十數里入一林躡石攀藤而行回顧已失使者又行三里餘見草舍一老父坐土榻上去邪訪

其處老父曰此乃嵩陽少室山下也老父問去邪所至之處去邪一一言老父遂細解去邪去邪知煬帝不永之事且曰子能免官卽脫身於虎口也去邪東行回視茆屋已失所在時麻叔謀已至甯陽縣去邪見叔謀具白其事初去邪入墓後其墓自崩將謂去邪已死今日却來叔謀不信將謂狂人去邪乃託狂疾隱終南山時煬帝以患腦疼月餘不視朝訪其因皆言帝夢中爲人搃其腦遂發痛數日乃是去邪見鼠之日也叔謀既至甯陵縣患風逆起坐不得帝令太醫令巢元方往視之曰風入腠理病在胸臆須用嫩羊肥者蒸熟糝藥食之則瘥叔謀取半年羊羔殺而取腔以和藥藥未盡而病以痊自後每令殺羊羔日數枚同杏酪五味蒸之置其腔盤中自以手攪擘而食之謂曰含酥嚮鄉村獻羊羔者數千人皆厚酬其直陵甯下馬村陶椰兒家中巨富兄弟皆兇悖以祖父塋域傍河道二丈餘慮其發掘乃盜他人孩兒年三四歲者殺之去頭足蒸熟獻叔謀咀嚼香美迥異於羊羔愛慕不已召詰椰兒椰兒乘醉泄其事及醒叔謀乃以金十兩與椰兒又令役夫置一河曲以護其塋域椰兒兄弟自後每盜以獻所獲甚厚貧民有知者競竊人家子以獻求賜襄邑甯陵

睢陽界所失孩兒數百冤痛哀聲旦夕不輟虎賁郎將段達爲中門使掌四方表奏事叔謀令家奴黃金窟將金一埒贈與凡有上表及訟食子者不訊其詞理並令筭背四十押出洛陽道中死者十有七八時令狐達知之潛令人收兒骨未及數日已盈車於是城市村坊之民有孩兒者家置木櫃鐵裹其縫每夜置子於櫃中鎖之全家秉燭圍守至明開櫃見子卽長幼皆賀旣達睢陽界有豪寨使陳伯恭言此河道若取直路徑穿透睢陽城如要回護卽取令旨叔謀怒其言回護令推出腰斬令狐達救之時睢陽坊市豪民一百八十戶皆恐掘穿其宅并塋域乃以釀金三千兩將獻於叔謀未有梯媒可達忽穿至一大林中有墓古老相傳云宋司馬華元墓掘透一石室室中漆燈棺柩帳幕之類遇風皆化爲灰燼得一石銘云睢陽土地高竹木可爲壕若也不迴避奉贈二金刀叔謀曰此乃詐也不足信是日叔謀夢使者召至一宮殿上一人衣絳綃戴進賢冠叔謀再拜王亦答拜畢曰寡人宋襄公也上帝命鎮此方二千年矣儻將軍借其方便回護此域卽一城老幼皆荷恩德也叔謀不允又曰適來護城之事蓋非寡人之意從奉上帝之念言此地後五百年間當有王者

建萬世之業豈可爲逸遊致使掘穿王氣叔謀亦不允良久有人入奏云大司馬華元至矣左右引一人紫衣戴進賢冠拜覲於王前王乃言護城之事其人勃然大怒曰上帝有命匡護叔謀愚昧之夫不曉天意乃大呼左右令置拷訊之物王曰拷訊之事何法最苦紫衣人曰鎔銅灌之口爛其腸胃此爲第一王許之乃有數武夫拽叔謀脫去衣惟畱犢鼻縛鐵柱上欲以銅汁灌之叔謀魂膽俱喪殿上人連止之曰護城之事如何叔謀連聲言謹依上命遂令解縛與本衣冠王令引去將行紫衣人曰上帝賜叔謀金三千兩取於民間叔謀性貪謂使者曰上帝賜金此何言也使者曰有睢陽百姓獻與將軍此陰注陽受也忽如夢覺既覺神不住體睢陽民果賂黃金三千兩因叔謀家奴黃金窟而獻叔謀思夢中事乃收之立召陳伯恭令自睢陽西穿渠南去回屈東行過劉趙村連延而去令狐達知之累上表爲段達抑而不獻至彭城路經大林中有偃王墓掘數尺不可掘乃銅鐵也四面掘去其土惟見鐵墓旁安石門扁鎖甚嚴用鄗人楊民計撞開墓門叔謀自入墓中行百步二童子當前曰偃王顛望久矣乃隨而入見宮殿一人戴通天冠衣絳綃坐殿上叔謀拜王亦拜

曰寡人瑩域當河道今奉與將軍玉寶遣君當有天下儻然護之丘山之幸也叔謀許之王乃令使者持一玉印與叔謀叔謀觀之印文乃古帝王受命寶也叔謀大喜

王又曰再三保惜此刀刀之兆也

刀刀者隱語亦二金刀之意也

叔謀出令兵夫曰護其墓時煬帝

在洛陽忽失國寶搜訪宮闈莫知所在隱而不宣煬帝督功甚急叔謀乃自徐州曉夕無暇所役之夫已少一百五十萬下塞之處死屍滿野帝在觀文殿讀書因覽史記見秦始皇築長城之事謂宰相宇文達曰始皇時至此已及千年料長城已應摧毀宇文達順帝意奏曰陛下偶然讀秦皇之事建萬世之業莫若修其城堅其壁帝大喜乃詔以舒國公賀若弼爲修城都護以諫議大夫高頴爲副使以江淮吳楚襄鄧陳蔡并開拓諸州丁夫一百二十萬修長城詔下若弼諫曰臣聞秦始皇築長城於絕塞連延一萬里男死女曠婦寡子孤其城未就父子俱死陛下欲聽狂夫之言學亡秦之事但恐社稷崩離有同秦世帝大怒未及發言宇文達在側乃叱曰爾武夫狂卒有何知而亂其大謀若弼怒以象簡擊宇文達帝怒令囚若弼於家是夜飲酖死高頴亦不行宇文達乃舉司農卿宇文弼爲修城都護以民部侍郎宇文愷爲

副使時叔謀開汴梁盈灌口點檢丁夫約折二百五十萬人其部役兵士舊五萬人折二萬三千人功既畢上言於帝決下口注水入汴梁帝自洛陽遷駕大梁詔江淮諸州造大船五百隻使命至急如星火民間有配著造船一隻者家產破用皆盡猶有不足枷項笞背然後鬻貨男女以供官用龍舟既成泛江沿淮而下至大梁又別加修飾砌以七寶金玉之類於是吳越取民間女年十五六歲者五百人謂之殿脚女至於龍舟御楫卽每船用綵纜十條每條用殿脚女十人嫩羊十口令殿脚女與羊相間而行牽之時恐盛暑翰林學士虞世基獻計請用垂柳栽於汴渠兩隄上一則樹根四散鞠護河隄二乃牽舟之人護其陰三則牽舟之羊食其葉上大喜詔民間有柳一株賞一縑百姓競獻之又令親種帝自種一株羣臣次第種方及百姓時有謠言曰天子先栽然後百姓栽栽畢帝御筆寫賜垂楊柳姓楊曰楊柳也時舳舻相繼連接千里自大梁至淮口聯綿不絕錦帆過處香聞百里既過雍丘漸達甯陵界水勢緊急龍舟阻礙牽駕之人費功轉甚時有虎賁郎將鮮于俱爲護纜使上言水淺河窄行舟甚難上以問虞世基曰請爲鐵脚木鵝長一丈二尺上流放下如木

鵝住卽是淺帝依其言乃令右翊將軍劉岑驗其水淺之處自雍丘至灌口得一百二十九處帝大怒令根究本處人吏姓名應是木鵝住處兩岸地分之人皆縛之倒埋於岸下曰令敎生作開河夫死爲抱沙鬼又埋却五萬人旣達睢陽帝問叔謀曰坊市人煙所掘幾何叔謀曰睢陽地靈不可干犯若掘之必有不祥臣已回護其城帝怒令劉岑乘小舟根訪屈曲之處比直路較二十里帝益怒乃令擒出叔謀囚於後獄急宣令狐達詢問其由達奏自甯陵便爲不法初食羊後啖嬰兒養賊陶榔兒盜人之子受金三千兩於睢陽擅易河道乃取小兒骨進呈帝曰何不奏達達曰表章數上爲段達扼定而不進帝令人搜叔謀囊中得睢陽民所獻金又得甯侯所還白璧及受命寶玉印上驚異謂宇文達曰金與璧皆微物寡人之寶何自而得乎宇文達曰必是遣賊竊取之帝瞪目而言曰叔謀今日竊吾寶明日盜吾首矣達在側奏曰叔謀常遣陶榔兒盜人之子恐國寶榔兒所盜也上益怒遣榮國公來護兒內使李百藥太僕卿楊義臣推鞠叔謀置臺署於睢陽并收陶榔兒全家令榔兒具招入內盜寶事榔兒不勝其苦乃具事招款又責段達所收令狐達奏章卽不奏之

罪獄成進上帝問丞相宇文達曰叔謀有大罪四條食人之子受人之金遣賊盜竄擅易河道請用峻法誅之其子孫取聖旨帝曰叔謀有大罪爲開河有功免其子孫只令腰斬叔謀於河側時來護兒受勅未至叔謀夢一童子自天而降謂曰宋襄公與大司馬華元遣我來感將軍護城之惠去年所許二金刀今日奉還叔謀覺曰據此先兆不祥我腰領難存矣言未畢護兒至驅於河之北岸斬爲三段榔兒兄弟五人并家奴黃金窟並鞭死中門外段達免死降官爲洛陽監門令

開河記終

古今說海 說纂乙集 煬帝開河記

古今說海

江行雜錄

說纂七散錄一

肅宗在春宮嘗與諸王從玄宗詣太清宮有龍見于殿之東梁玄宗目之顧問諸王有所見乎皆曰無之問太子太子俛而未對上問頭在何處曰在東上撫之曰真我兒也

因話錄

和政公主肅宗第三女也降柳渾肅宗宴于宮中女優有弄假官戲其綠衣乘簡者謂之參軍椿天寶末蕃將阿布思伏法其妻配掖庭因使隸樂工是日遂爲假官之長所謂椿者及侍宴皆笑樂公主燭俛首顰目不視上問其故公主曰禁中侍女不少何必須此人使阿布思真逸人也其妻亦同刑人不合近至尊之座果冤橫又豈忍使妻與群優雜處爲笑謔之具哉妾雖至愚深以爲不可上亦憫惻遂罷戲而免阿布思之妻由是賢重公主

令狐文公除守兗州州境方旱米價甚高公至首問米價幾何州有幾倉屈指獨語曰舊價若干四倉各出米若干以若干定價糶則可以賑救矣左右聽之流語遍郡

中富人競發所畜物價乃平人心欣然

賈耽精於術數有一叟失牛詣桑國師占師曰爾牛在賈相公帽筒中叟迎公首訴之公笑取筒中式盤據鞍作封曰爾牛在安國觀之門後大槐鵲巢中便往探視見旁有人繫牛乃獲盜牛者

牛奇章帥維揚杜牧在幕中夜多微服逸遊公聞之以街子數輩潛隨護之以防不虞後牧之以拾遺召臨別公以縱逸爲戒牧之始猶諱之公命取一篋皆街子報帖云杜書記平善乃大感服

杜牧之阿房宮賦云六王畢四海一蜀山兀阿房出陸倕作長城賦云千城絕長城列秦民竭秦君滅慘輩行在牧之前則阿房宮賦又祖長城句法矣牧之云明星熒熒開妝鏡也綠雲擾擾梳曉鬟也渭流漲膩棄脂水也煙斜霧橫焚椒蘭也雷霆乍驚宮車過也輶輶遠聽杳不知其所之也盛言秦之奢侈楊敬之作華山賦有云見若咫尺田千畝矣見若環堵城千雉矣見若杯水池百里矣見若蟻蛭臺九層矣蜂窠聯聯起阿房矣小星熒熒咸陽矣華山賦杜司徒佑已常稱之牧之乃佑孫亦

是傲敬之所作信矣文章以不蹈襲爲難也

瑞桂堂
暇錄

元相國之鎮江夏也嘗秋夕登黃鶴樓遙望海江之濱有光若殘星焉乃令親信往觀之遂櫂小舟直至江所乃釣船也詢彼漁云適獲一鯉光則無之親信乃攜鯉而來既登樓命庖人剖之腹中得古鏡二如古錢大以面相合背則隱起雙龍雖小而鱗鬣鬚爪悉具既磨瑩則常有光輝公寶之置巾箱中及相國薨鏡亦亡去

外王父中書令晉國公宣宗朝再啓黃閣不協比於權道惟以公諒宰大政四方有請訴礙於法者必固爭不已由是征鎮忌焉然志尙典籍雖門施行馬庭列鳧鍾而尋繹未嘗稍倦於永甯里第別構書齋每退朝獨處其中愉愉如也大中三年因請假將入齊惟所擾卑脚犬花鴨從既啟扉而花鴨連銜公衣卻行叱去復至既入閣花鳥仰視吠轉急公亦疑之乃匣中拔千金劍按於膝上向空祝之曰若有異類陰物可出相見吾乃大丈夫豈懼于鬼輩而相迫邪言訖歛有物從梁上墜地乃人也朱髮衣短褐衣色貌黝瘦頓首連拜惟曰死罪公止之且詢其姓名何爲對曰李龜壽盧龍塞人也或有厚賂龜壽令不利於公龜壽上感鈞化復爲花鴨所驚形不能

匿令公若貫龜壽萬死之罪願以餘生服事台鼎公曰待汝以不死遂命元從都押衙傳存隸之明日且有婦人至第門服裝單急曳履而抱持襁嬰請于闈曰幸爲呼李龜壽龜壽乃出其妻且曰訝君稍遲昨夜半自前來相見耳遂與龜壽同止及公薨龜壽盡室亡去

小說舊聞記

白樂天詩云倦倚繡牀愁不動緩垂綠帶髻鬟低遼陽春盡無消息夜合花開日又

西好事者畫爲倦繡圖

娛書堂詩話

梁太祖統四鎮日名濫與崔相國連構大事崔每奏太祖忠赤委之關東國無患矣昭宗遽勅太祖改名全忠識者曰全字人王也又在中心其不可也近臣亦奏上方悔焉勅命旣行追之莫及後果篡大位是時四方天下具在中心賜名之應也

鑑戒錄

王平甫云花蕊宮詞三十二首今考王恭簡續成初集記纔二十八首盡筆於此庶眞贗了然 五雲樓閣鳳城間花木長新日月閒三十六宮連內苑太平天子坐崑山會眞廣殿約宮牆樓閣相扶接太陽靜飭玉堦橫水岸御香爐燕撲龍牀龍池九曲遠相通楊柳絲牽兩岸風長似江南好春景畫船來去碧波中東內斜將紫禁通

龍池鳳苑夾城中曉鐘聲斷嚴妝罷院院紗牕海日紅殿名新立號重光島上池臺
盡改張但是一人行幸處黃金閣內鎖牙牀安排諸院接行廊水檻周回十里強青
錦地衣紅繡毯盡鋪龍腦鬱金香夾城門與內門通朝罷巡遊到苑中每日中官祇
候處滿堤紅豔立春風廚船進食簇時新侍坐無非列近臣日午殿頭宣索膾隔花
催喚打魚人立春日進內園花紅蕊輕輕嫩淺霞跪到玉堦猶帶露一時宣賜與宮
娃三面宮城近夾墻苑中池水白茫茫亦從獅子門前入旋見亭臺繞岸傍離宮別
院繞宮城金板輕敲合鳳笙夜夜月明花樹底傍池長有按歌聲御製新翻曲子成
六宮纔唱未知名盡將睿藻來鈔譜先按君王玉笛聲旋移紅樹斷青苔宣使龍池
再鑿開展得綠波寬似海水心樓殿勝蓬來太虛高閣凌波殿背倚城牆面浸池諸
院各分娘子位羊車到處不教知脩儀承寵住龍池掃地焚香日午時等候大家來
院裏看教鸚鵡念宮詩才人出入每相隨筆硯將來繞曲池張向綵牋書大字忽防
御製寫新詩六宮官職總新除宮女安排入畫圖二十四司分六局御前頻見錯相
呼春風一面晚妝成偷折花枝傍水行却被內監遙覩見故將紅豆打黃鸞梨園弟

子簇池頭小樂攜來候燕遊旋把銀笙先按拍海棠花下合梁州殿前排燕賞花開
宮女侵晨探幾回斜望花開遙舉袖傳聲先喚近臣來小毯場近曲池頭宣喚勳臣
試打毬先向畫廊排御幄管弦聲動立浮油供奉頭籌不敢爭上棚專喚近臣名內
人酌酒纔宣賜馬上齊呼萬歲聲殿前宮女總纖腰初學乘騎怯又嬌上得馬來纔
似走幾回拋鞚抱鞍橋自教宮娥學打毬玉鞍初跨柳腰柔上棚知是官家認遍遍
長贏第一籌翔鸞閣外夕陽天樹影花光水接連望見內家來往處水門斜過罨樓
船內人追逐采蓮時驚起沙鷗兩岸飛蘭棹把來齊拍水並船相鬪濕羅衣新秋女
伴各相逢罨畫船飛別浦中旋折荷花伴歌舞夕陽斜照滿衣紅月頭支給買花錢
滿殿宮娥盡十千遇著唱名多不應含羞急過御牀前

寶退錄

周恭帝幼冲軍政多決於韓通通愚懷太祖英武有度量多智略屢立戰功由是將
士皆愛服歸心焉及將北征京師民間諠言出軍之日當立點檢爲天子富室或挈
家逃匿於外州獨宮中不之知太祖懼密以告家人曰外間詢詢如此將若之何太
祖姊或云卽魏氏長公主方在廚引麪杖逐太祖擊之曰大丈夫臨大事可否當自決胸懷乃

來家間恐怖婦女何爲

凍水紀聞

太祖之自陳橋還也太夫人杜氏方設齋於定力院聞變王夫人懼杜太夫人曰吾兒平生奇異人皆言當極貴何憂也言笑自若是日太祖卽位契丹北漢兵皆退京都中下之戶不重生男每生女則愛護如捧璧擎珠甫長成則隨其資質教以藝業用備士大夫採拾娛侍名目不一有所謂身邊人本事人供過人針線人堂前人劇雜人拆洗人琴童棋童廚娘等級截乎不紊就中廚娘最爲下色然非極富貴家不可用余以寶祐丁巳參闈寓江陵嘗聞時官中有舉其族人置廚娘事首末甚息謾書之以發一笑其嫠人名某者奮身寒素已歷二倅一守然受用澹泊不改儒家之風偶奉祠居里使嬖不足使令飲饌且大粗率守念昔甯某官處晚膳出京都廚娘調羹極可口適有便介如京謾作承受人書託以物色費不屑較未幾承受人復書曰得之矣其人年可二十餘近回自府第有容藝能算能書旦夕遣以詣直不旬月果至初憇五里頭時遣脚夫先申狀來乃其親筆也字畫端楷歷敘慶幸卽日伏事左右末乞以四轎按取庶成體問辭甚委曲殆非庸碌女子所可及守一見爲之

破顏及入門容止循雅紅裙翠裳參視左右乃退守大過所望少選親朋皆議舉杯爲賀廚娘廚娘遽至使廚請曰未可展會明日且是常食五杯五分廚娘請食品菜品資次出書以示之食品第一爲羊頭僉菜品第一爲蔥齏餘皆易辨者廚娘謹奉旨教舉筆硯具物料內羊頭僉五分各用羊頭十箇蔥韭五碟合用蔥五斤他物稱是守固疑其妄然未欲遽示以儉鄙姑從之而密覘其所用翌旦廚師告物料齊廚娘發行隨取鍋銚盂勺湯盤之屬令小婢先捧以行燿燦耀目皆白金所爲大約計該五七十兩至如刀砧雜器亦一一精緻傍觀嘖嘖廚娘更圍襖圍裙銀索攀膊掉臂而入據坐胡牀切徐起取抹批攪慣熟條理真有運斤成風之勢其治羊頭也漉置几上別畱臉肉餘悉擲之地衆問其故廚娘曰此皆非貴人所食矣衆爲拾頓他所廚娘笑曰若輩真狗子也衆雖怒無語以荅其治蔥韭也取蔥微微過沸湯悉去鬚葉視櫟之大小分寸而截之又除其外數重取條心之似韭黃者以淡酒醃浸漬餘棄置了不惜凡所供備馨香脆美濟楚細膩難以盡其形容食者舉筋無贏餘相顧稱好旣撤席廚娘整襟再拜曰此日試廚萬幸台意須照例守方遲難廚娘曰豈

非待檢例邪探囊取數幅紙以獻曰是昨在某官處所得支賜判單也守視之其例每展會支賜絹帛或至百疋錢或至三二百千無虛拘者守破慳勉強私竊喟歎曰吾輩事力單薄此等筵宴不宜常舉此等廚娘不宜常用不兩月託以他事善遣以還其可笑如此

陽谷漫錄

溫公之任崇福春夏多在洛秋冬在夏縣每日與本縣從學者十許人講書用一大竹筒筒內貯竹簽上書學生姓名講後一日卽抽簽令講講不通則微數責之公每五日作一暖講一杯一飯一麪一肉一菜而已公先隴在鳴條山墳所有餘慶寺公一日省墳止寺中有父老五六輩上謁云欲獻薄禮乃用瓦盆盛粟米飯瓦罐盛菜羹真飯土簋啜土錮也公亨之如太牢旣畢復前啓曰某等聞端明在縣曰爲諸生講書村人不及往聽今幸略說公卽取紙筆書庶人章講之旣已復前白曰自天子章以下各有毛詩兩句此獨無有何也公默然少許謝曰某平生慮不及此當思其所以奉荅村父笑而去每見人曰我講書曾難倒司馬端明公聞之不介意

懶真子錄

建炎己酉秋杭州清波門裏竹園山平地涌血須臾成池腥聞數里明年金人殺戮

萬人卽暗竹園也熙寧八年冬杭州地涌血者三最後流入于河腥不可聞

林子中野史

有稱中興野人和東坡念怒嬌詞題吳江橋上車駕巡師江表過而覩之詔物色其人
不復見矣詞云炎精中否歎人才委靡都無英物胡虜長驅三犯闕誰作長城堅
壁萬國奔騰兩宮幽陷此恨何時雪草廬三顧豈無高臥賢傑天心眷我中興吾皇
神武踵曾孫周發河嶽封疆俱効順虜狂會須灰滅翠羽南巡扣闥無語徒有衝冠
髮孤忠耿耿劍鋒冷浸秋月

野史

古者尙書令史防禁甚密宋法令史白事不得宿外雖八座命亦不許李唐令史不
得出入夜鎖之韓愈爲吏部侍郎乃曰人所以畏鬼以其不見鬼如可見則人不畏
矣選人不得見令史故令史勢重任其出入則勢自輕不禁吏出入自文公始

野史

徽宗北狩四太子請王婉容爲粘罕子婦上遣之曰好事新主及行大哭曰何忍以
一身事兩主就輿中以匱刀自刎太子曰南宋大臣未有如此者擇地葬之至碑曰

貞婦冢

吹劍錄

光堯聖壽太上皇帝當內修外攘之際尤以文德服遠至於宸章睿藻日星昭垂者

非一紹興二十八年將郊祀有司以太常樂章篇序失次文義弗協請遵真宗仁宗朝故事親製祭享樂章詔從之自郊社宗廟原廟等共十有四章肆筆而成睿思雅正宸文典贍所謂大哉王言也至於一時閑適寓景而作則有漁父辭十五章又清新簡遠備騷雅之體其辭有曰薄晚煙林淡翠微江邊秋月已明輝縱遠柁適天機水底閒雲片段飛又曰青草開時已過船錦鱗躍處浪痕圓竹葉酒柳花氈有意沙鷗伴我眠又曰水涵微影湛虛明小笠輕蓑未易晴明鏡裏縠紋生白鷺飛來空外聲辭不能盡載觀此數篇雖古之騷人詞客老於江湖擅名一時者不能念及

奎章錄

通判監酒趙詩者昔在學校嘗因齋生熟寐與衆戲以香燭花果楮錢之類設供於臥榻前而潛同之寢者既覺見之曰我已死邪因唏噓不已少頃復寐久不起視之真死矣乃徹供設之物相與秘之斯人豈乍覺見此神魂驚散遂不復還體也邪事有不可知者

馬氏新錄

宋廖瑩中錄

江行雜錄終

古今說海

行營雜錄

說纂八 散錄二

太祖初受周幼主命北討至陳橋爲三軍推戴時太后以下眷屬悉在定力院設齋有司來搜捕主僧令登閣而固其扃鑰俄大搜索僧給云皆散走不知所之矣甲士入寺升梯且發鑰見蛛網布滿其上而塵埃凝積若累年不曾開者乃相告曰是安得有人遂皆去有頃太祖已踐祚矣

太祖潛躍日常與一道士游關河無定姓名自曰混沌或又曰真無每劇飲爛醉且善歌能引其喉於杳冥之間作清微之聲時或一二句隨天風飄下惟太祖聞之曰金猴虎頭四真龍得真位至醒詰之則曰醉夢豈足憑邪至膺圖受禪之日乃庚申正月初四也自御極不再見下詔草澤徧訪之或見於轅轅道中或嵩洛間後十六載乃開寶乙亥歲也上已被禊駕幸西沼道士忽醉坐水次木陰下笑揖上曰別來安善上大喜亟遣中人密引至後掖恐其遁急回蹕見之一如平時抵掌浩飲上曰久欲見汝決一事我壽還得幾多在道士曰但今年十月二十日夜晴則可延一紀

不爾則當速措置上酷畱之俾居後苑苑吏或見宿於木末鳥巢中數日忽不見上切切記其語至所期之夕上御太清閣以望氣是夕果晴星斗明燦上心方喜俄而陰霾四起天地陡變雪雹驟降移仗下閣急傳宮鑰開門召開封尹卽太宗也延入內寢酌酒對飲宦官宮妾悉屏出但遙見燭影下太宗時或避席有不可勝之狀飲訖漏三鼓雪已數寸上引柱斧截雪顧太宗曰好做好做遂解帶就寢鼻息如雷是夕太宗畱宿禁內將五鼓周廬者寂無所聞帝已崩矣

湘山野錄

李後主歸朝後每懷故國且念嬪妾散洛鬱鬱不自聊嘗作長短句簾外雨潺潺春意將闌羅衾不奈五更寒夢裏不知身是客一餉貪歡獨自莫凭闌無限關山別時容易見時難流水落花春去也天上人間意思悽惋不久下世

金玉詩話

祥符中封禪事竣宰執對于後殿上曰治平無事久欲與卿等一處閒玩今日可矣遂引群公及內侍數人入一小殿多有假山甚高山面有洞上既入乃復招群公從行初覺甚暗數十步則天宇豁然千峯百嶂雜花流水盡天下之偉觀少焉至一所重樓複閣金碧照耀有一道士貌亦奇古來揖上執禮甚恭上亦答之良厚邀上主

席上再三遜謝然後坐群臣再拜居道士之次所論皆玄妙之旨而牢醴之屬又非人間所見也鸞鶴舞庭除笙簫振林木至夕乃罷道士送上出門而別曰萬幾之暇無惜與諸公頻見過也復由舊路以歸臣下因以請于上上曰此道家所謂蓬萊三山者也群臣自失者累日後亦不復再往不知何術以致之也

投轄錄

慶曆三年有李京者爲小官吳鼎臣在侍從二人相與通家一日薦其友人於鼎臣求爲聞達于朝鼎臣卽繳書具奏之京坐貶官未行京妻謁鼎臣妻叙別鼎臣妻慙不出京妻立廳事召鼎臣幹僕語之曰我來雖爲往還之久欲求一別亦爲乃公嘗有數帖與吾夫祝私事恐爾家以爲疑索火焚之而去

王嗣宗守邠土邠舊有狐王廟相傳能爲人禍福歲時享祀祈禱不敢少怠至不敢道故嗣宗至郡集諸邑獵戶得百餘人以甲兵圍廟薰灌其穴殺百餘狐或云有大白狐從火中逸去其妖遂息後人復爲立廟則寂無靈矣嗣宗後帥長安處士种放者朝廷所尊禮每帥守至輒面數之嗣宗不服以言拒之放責數嗣宗聲色俱厲嗣宗怒以手批其頰先是眞宗有勅書令放有章奏卽附驛欲詣闕卽乘驛放遂乘驛

訴於上前上特於嵩山之陽置書院以處之後嗣宗去郡有人贈詩曰終南處士威風滅渭北妖狐窟穴空嗣宗大喜歸告其子孫曰吾死更勿爲碑誌但石刻此詩置于墓旁吾其榮矣

僞蜀廣政末成都人唐季明因破一木中有紫文隸書太平兩字時以爲佳瑞有識者云不應此時須成都破後方見太平爾自王師平蜀頻施曠蕩之恩仍有太平興

國之號

茅亭客話

大中祥符六年緜州彰明縣崇仙觀栢柱上有木文如畫天尊狀毛髮眉目衣服履舄纖縷悉備知州比部員外郎劉宗言遂繪事奏聞奉旨令津置赴闕送玉清昭應

宮今川民皆圖畫供養之

茅亭客話

成都漆工艾延祚甲午歲爲賊所驅於郡治令造漆器五月六日忽聞鼓聲及南門火起乃天兵至郡也延祚窘甚緣上大樹匿穠葉間見天兵往來搜捕殺戮狼籍至夜遂下樹臥積屍中及中宵聞數十人傳呼聲頗類將吏且無燭炬因竊視之不見其形但聞按籍點名僵屍聞呼一一應之惟不呼延祚乃知聖朝伐叛討逆悉奉

行天誅也

茅亭客話

唐南胡則守江州堅壁不下曹翰攻之危急忽有旋風吹片紙墜城中有詩曰由來秉節世無雙獨守孤城死不降何似知機早回首免教流血滿長江後城陷屠殺殆盡謂之洗城

江表志

人傳溫公西江月詞流播已久今又得一首名錦堂春云紅日遲遲虛廊轉影槐陰迤邐西斜彩筆工夫難狀晚景煙霞蝶尙不知春去漫繞幽砌尋花奈猛風過後縱有殘紅飛向誰家始知青鬢無價歎飄零官路荏苒年華今日笙歌叢裏特地咨嗟席上青衫濕透算感舊何止琵琶怎不教人易老少多離愁散在天涯

劉貢父爲中書舍人一日朝會幕次與三衛相鄰時諸帥兩人出軍伍有一水晶茶盃傳玩良久一帥曰不知何物所成瑩潔如此貢父隔幕謂之云諸公豈不識此乃多年老冰耳

慶厯中郎官呂覺者勘公事回因登對自陳衣緋已久乞改章服上曰待別差遣與卿換朕不欲因鞫獄與人恩澤慮刻薄之徒望風希進加入人罪耳

始謀錄

神考嘗問荆公卿曾看歐陽修五代史否對曰臣不曾仔細看但見每篇首必曰嗚呼是豈五代時事事可歎者乎

昭陵上賓前一月每夜太廟中有哭聲不敢奏一日太宗神御前香案自壞道山清話

元祐癸酉九月一日夜開寶寺塔表裏通明徹旦禁中夜遣中使齋降御香寺門已

閉既開寺僧皆不知也寺中望之無所見去寺漸明後二日宣仁上仙道山清話

國家開寶中所鑄錢文曰宋通元寶至寶元中則皇宋通寶近世錢文皆著年號惟

此二錢不然者以年號有寶字文不可重也歸田錄

皇女爲公主其夫必拜駙馬都尉教謂之駙馬宗室女封郡主者謂其夫爲郡馬縣

主者爲縣馬不知何義歸田錄

神廟一日行後苑見牧豨猪者問何所用牧者曰自太祖來常令畜之自稚養以至

大則殺之又養稚者累朝不敢易亦不知何用神廟沉思久之詔付所司禁中自今

不得復畜月餘忽獲妖人急欲血澆之禁中卒不能致方悟祖宗遠略冷齋夜話

司馬溫公隧碑賜名清忠粹德紹聖初毀磨之際大風走石群吏莫敢近獨有一匠

氏揮斤而擊未盡碎忽仆碑下而死

東坡仁宗朝登進士科復應制科擢居異等英宗朝判鳳翔欲以唐故事召入翰林宰相限以近例且欲召試祕閣上曰未知其能否故試之如軾豈不能邪宰相猶難之及試又入優等遂直史館神宗朝以議新法不合補外李定之徒媒孽其詩文有訕上語下詔獄欲寘之死上獨庇之得出方在獄時宰相舉軾詩云根到九泉無曲處世間惟有蟄龍知此不臣也上曰詩人之詞安可如此推求時相語塞上一日與近臣論人才因曰軾方古人孰比近臣曰頗似李白上曰不然白有軾之才無軾之學累有意復用而言者力沮之一日忽出手札曰蘇軾黜居思咎閱歲茲深人材實難不忍終棄因量移臨汝哲宗期起知登州召爲南宮舍人不數月遷西掖遂登翰苑紹聖後熙豐諸臣當國元祐諸臣例遷謫崇觀間京卞用事拘以黨籍禁其文辭墨迹而毀之政和間忽弛其禁求軾墨迹甚銳人莫知其由或傳徽宗親臨寶籙宮醮筵其主醮道流拜章伏地久之方起上詰其故答曰適至上帝所值奎宿奏事良久方畢始能達其章也上歎訝久之問曰奎宿何神爲之所奏何事對曰所奏事不

可知爲此宿者卽本朝蘇軾也上大驚不惟弛其禁且欲玩其詞翰一時士大夫遂從風而靡

道君皇帝大觀二年戊子秋八月以易數一一〇×一〇×一乃御製易運碑刻之延福

殿東壁其略曰始建元基寓宗御紹興德壽謂紹興年承太乙循運盡在陽九之數

高宗聖壽八十一歲祖傳甲庚吉太祖子孫再傳建炎炎共盛之勢建炎年號奈何五行逆順天地之數非

由人致朕嘗聞易孰善本基庚子辛丑禍起東南謂方臘肇動干戈元衝立劫壬寅癸

卯宣和間天下大亂亦云哀哉甲辰乙巳與金虜夾攻燕山丙午丁未金虜入寇二帝北狩內有丙火天下生

靈塗炭至半是時天下大亂江表之虞江表幸莫知何辜戊申己酉高宗初立時正災劫金虜渡江苗劉內變

庚戌辛亥偏重勢輕高宗航海劉豫稱帝于汴壬子癸丑後成改建紹興元年甲寅乙卯立應豐稷是年

有丙辰丁巳朕已何在徽宗以紹興五年崩祖宗復有中興之後是年孝宗以建國公進封普安郡王復紹太祖之後

云其後事皆歷驗信乎聖哲先知之明因往推來在天數者果不可道與坦齋筆衡

初陳橋兵變太祖整軍從仁利門入建炎南渡御蹕過杭聞縣名曰仁和上甚喜曰

此京師門名也遂有定都之意

道教之方盛也一時詔命章表皆指佛爲金狄焉試舉其略政和元年四月詔曰朕每澄神默受帝命訂正訛俗闕中華被金狄之教盛行而至眞之道未正宣和三年十一月詔曰噫金狄胡風陰邪之氣源流派分使信者以寂滅爲樂豈非陰氣襲而陽魄散邪林靈素凡四五表皆以金狄爲語如賀神霄降云蠢金狄之成群干丹霄之正法如謝駕幸寶籙院聽講大洞經云幸際玉霄之主是膺金狄之風又云金狄至而華風變又云期銷金狄之魔而宣和元年道德院方奏金芝生車駕幸觀因幸蔡京家鳴鸞堂置酒時蔡京有詩徽宗卽席賜和曰道德方今喜迭興萬邦從化本天成定知金帝來爲主不待春風便發生其後女眞起海上滅遼陷中原以金爲國號讖金狄之禍而金帝之來不待春風蓋虜以靖康元年冬犯京師以閏十一月二十五日城陷時太史預借春出土牛以迎新歲竟無補於事則徽宗賜和之句甚符其讖可勝歎哉

坦齋
筆衡

監左帑龍舒張宣義嘗言有親戚宦遊西蜀路經襄漢晚投一店行戶外忽見旁左側上有一人無首以爲鬼也主人云尊官不須驚此人也非鬼也往年因患瘰癧病

勢蔓衍一旦頭忽墜脫家人以爲不可救而竟不死自此每有所需則以手指畫但日以粥湯灌之故至今猶存耳又云岳侯軍中一兵犯法梟首妻方懷妊後誕一子如常人而首極細軀幹甚偉首僅如拳眉目皆如刻畫則知胞胎所係父母相爲感應

行都紀事

嘉興精嚴寺大刹也僧造一殿中塑大佛詭言婦人無子者禱祈于此獨寢一宵卽有子殿門令其家人自封鎖蓋僧於房中穴地道直透佛腹穿頂而出夜與婦人合婦人驚問則云我是佛州人之婦多陷其術次日不敢言有仕族妻亦往求嗣中夜僧忽造前旣不能免卽嚙其鼻僧去翌日其家遣人遍於寺中物色見一僧臥病以被韜面揭而視之鼻果有傷掩捕聞官時韓彥古子師爲郡將流其僧廢其寺

行都紀事

豐有俊字宅之四明人登青樓偶見小倡疑故人女累目之女亦悟酒罷畱宿女羞澁良久乃入曰豐官人識妾否詰之果故人女豐曰某所以畱者以坐間不敢問也且各寢必有以處汝娼遂退豐與京尹有契明日以白尹且云某僅有錢百千從公更貸二百千嫁之尹嘉其誼卽取入府厚匿具擇良士嫁焉尹卽王宣子佐也

稗史

天台宋氏家本富後貧鬻廬於隣價成作詩曰自歎年來刺骨貧吾廬今已屬西隣
殷勤說與東園柳他日相逢是路人富者見詩惻然卽以券還之亦不索其直鄉人

嘉其誼

稗史

有夫出外而妻獨居者忽夜半見一道人從空而下逼與爲淫婦入室取刀爲誓曰
汝若逼我有死而已相持至曉乃一喫菜事魔人也信哉邪之不可干正也如此
馬裕齋知處州禁民捕蛙有一村民犯禁乃將冬瓜切作蓋刳空其腹實蛙于中黎
明持入城爲門卒所捕械至于庭公心怪之問曰汝何時捕此蛙答曰夜半有知者
否曰唯妻知公追其妻詰之乃妻與人通俾妻教夫如此又先往語門卒以收捕意
欲陷夫於罪而據其妻也公窮究其罪遂寘妻并姦夫於法

初初隆祐太后升遐朝廷欲建山陵大臣謂諸帝陵寢今在伊洛不日復中原卽歸
祔矣宜以攢宮爲名遂卜吉於會稽民間冢墓附近者往往他徙高宗思陵興役之
際孝宗密勅無輒壞民墓其愛物之心一至於此文王澤及枯骨未足多也
有士人貧甚夜則露香祈天益久不懈一夕忽聞空中語曰帝閔汝誠使我問汝所

欲士答曰某所欲甚微非敢過望但願此生衣食麤足逍遙山水間以終其身足矣空中大笑曰此上界神仙之樂何可易得若求富貴則可矣予因歷數古人極貴念歸而終不遂者皆是蓋清樂天所靳惜百倍於功名爵祿也

梁溪漫志

歐公甥女適夫張氏夫死攜孤女歸父家嫁公族子晟晟之官至宿州赴郡宴歸而失其舟至京師捕得之開封府勘乃梢人與晟妾通妻知而欲笞之反爲妾所誘併與梢人通府尹承當路風旨令張氏引公以自解獄奏仁宗大駭遣中使王昭明監勘而張氏反異公遂得明白猶坐以張氏匱具買田作歐陽戶名出知滁州

松陽縣民有被毆經縣驗傷翌日引驗了無癍痕宰怪而詰之乃仇家使人要歸飲以熟麻油酒臥之火燒地上覺而疼腫盡消又有口中創血如箭出醫者以炒原蠶蛾末傅之立愈又云前方亦治跌撲後方大治金瘡

吹劍續錄

孝宗畱心經術無所不涉奏對官被顧問者多致失措有王過者蜀人上殿孝宗驟問曰李融字若川謂何過卽對曰天地之氣融而爲川結而爲山李融之字若川如元之字次山也上大喜遂詔改官密院編修

坦齋筆衡

紹興中金人遣其秘書監劉陶來聘因問岳飛以何罪而死館伴者無以對但曰意欲謀叛爲部將所告以抵誅陶曰江南忠臣善用兵者止有岳飛所至紀律甚嚴秋毫無犯所謂項羽有一范增而不能用所以爲我擒如飛者其亦江南之范增乎館伴者默不能對秦檜聞之約束勿奏俄以不職貶其人

坦齋筆衡

行都崇新門外鹿花寺乃殿帥楊存中郡王特建以處北地流寓僧一歲元宵側近營婦連夜入寺觀燈有殿司將官妻同一女往觀乃爲數僧引入房中置酒盛饌逼令其醉遂畱夜於幽室遽殺母而畱女女不敢哀及半年三僧盡出其房窻外乃是野地女因窺窻見一卒在地打草呼近窻下備語前事可急往某寨某將家報知速來取我卒如言往報將官卽告楊帥帥令人告報本寺云來日郡王自齋合寺僧行人力本府自遣廚子排齋至是坐定每二卒擒下一僧合寺僧行人力盡縛之又令百餘卒破其寺果得此女見父號慟遂綁三人主首送所屬依法施行而毀其寺遂去諸髡

葦航紀談

行營雜錄終

宋趙葵錄

宣統元年七月出版

不許複製

藏版者

集成圖書公司

印刷所

上海南京路
集成圖書公司

總發行所

上海棋盤街
集成圖書公司

分發行所

北京 天津 漢口 廣東 山西
集成圖書公司

經售處

各埠大書坊

古今說海全部計十二冊
定價大洋四元正

金 山 高 氏
捐 贈 圖 書

上海图书馆藏书



A541 212 0017 0138B

